

**UCAPAN DATUK SERI PANGLIMA HAJI HAJIJI NOOR SEMPENA MAJLIS PERASMIAN
PEMBUKAAN PERAYAAN PESTA KAAMATAN PERINGKAT NEGERI SABAH PADA 30 MEI
2021, DEWAN HONGKOD KOISAAN (KDCA) PENAMPANG**

Salam Sejahtera dan Salam Sabah Maju Jaya

1. Kita bersyukur kerana dapat bersama di Majlis Perasmian Pembukaan Perayaan Pesta Kaamatan Peringkat Negeri Sabah 2021 pada hari ini. Walaupun pandemik COVID-19 telah mengubah cara kita meraikan perayaan ini iaitu secara maya, namun kita dapat meraikannya dengan meriah tetapi sederhana. Apa yang penting kita harus berwaspada dan sentiasa mematuhi prosedur operasi standard (SOP) supaya penularan Covid-19 dapat disekat.
2. Tema Kaamatan pada tahun 2021 iaitu, “Kaamatan Tanpa Sempadan demi Perdamaian dan Keamanan”, amat bertepatan dengan keadaan sekarang. Pergerakan rakyat antara daerah, negeri dan negara amat terhad demi memutuskan rantai penularan COVID-19. Namun di sebalik pergerakan yang terhad, masyarakat masih berpeluang untuk menggunakan teknologi digital dengan lebih meluas, termasuk perayaan ini. Saya dimaklumkan siaran langsung melalui media sosial ini mendapat sambutan yang sangat memberangsangkan.
3. Pesta Kaamatan adalah perayaan penting bagi Negeri Sabah khususnya kepada masyarakat Kadazan, Dusun, Murut dan Rungus (KDMR) serta etnik lain di negeri ini. Perayaan Kaamatan yang membawa mesej perdamaian dan keamanan, perlu dijadikan asas untuk rakyat terus bersatu dan memperkasa semangat perpaduan yang sedia terjalin, khususnya bagi negeri Sabah yang sentiasa menjadi model perpaduan masyarakat berbilang kaum di Malaysia.
4. Kaamatan adalah satu wadah yang penting untuk terus memupuk semangat perpaduan dan kerjasama yang erat untuk membawa negeri ini ke tahap pembangunan yang lebih tinggi. Ini sejajar dengan aspirasi Kerajaan Negeri dalam memajukan pelan pembangunan Halatuju Sabah Maju Jaya (SMJ) yang saya lancarkan pada bulan Mac lalu. SMJ menggariskan tiga teras utama iaitu pertanian, perindustrian dan pelancongan, diikuti dengan tumpuan kepada modal insan dan kesejahteraan rakyat serta jaringan infrastruktur dan kelestarian hijau.
5. Justeru, saya ingin mengambil kesempatan menyeru seluruh rakyat di Sabah untuk sentiasa bersama-sama dengan Kerajaan demi kesejahteraan dan kemajuan negeri ini. Marilah kita memberi sokongan padu kepada kerajaan agar usaha untuk membangun dan memajukan negeri akan dapat dilaksanakan dengan jayanya
6. Syabas dan tahniah kepada YB Datuk Seri Panglima Dr. Jeffery Kitingan, Timbalan Ketua Menteri merangkap Menteri Pertanian dan Perikanan yang telah mengambil peranan sebagai Pengerusi Jawatankuasa Induk Sambutan Perayaan Kaamatan Peringkat Negeri Sabah 2021 dan semua ahli jawatankuasa yang terlibat menjayakan perayaan Kaamatan Peringkat Negeri 2021.

7. Dengan ini, saya dengan sukacitanya merasmikan Majlis Perasmian Pembukaan Kaamatan Peringkat Negeri Sabah 2021. Selamat Menyambut Pesta Kaamatan, Kotobian Tadau Tagazo Do Kaamatan.

Sekian, terima kasih. Kotohuadan